



REPUBLIKA E SHQIPËRISË
Kuvendi

PROJEKT LIGJ

Nr._____/2019

PËR

PËR TRAJTIMIN FINANCIAR, SUPLEMENTAR, TË PUNONJËSVE
QË KANË PUNUAR NË MINIERA, NË NËNTOKË, TË PUNONJËSVE
TË INDUSTRIË SË NAFTËS E TË GAZIT DHE TË PUNONJËSVE
QË KANË PUNUAR NË METALURGJI

Në mbështetje të neneve 78 e 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë,

V E N D O S I:

Neni 1
Qëllimi

Qëllimi i këtij ligji është trajtimi financiar, përveç trajtimit të përcaktuar në ligjet nr.4171, datë 13.9.1966, “Për sigurimet shoqërore në Republikën Popullore të Shqipërisë”, dhe nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, të punonjësve që kanë punuar në miniera, në nëntokë, të punonjësve të industrisë së naftës e të gazit dhe të punonjësve që kanë punuar në metalurgji.

Neni 2
Përfituesit

Përfitues, sipas këtij ligji, janë personat që kanë plotësuar kushtet e përcaktuara në këtë ligj, kur kanë punuar në punë dhe profesione sipas përcaktimeve të nenit 3, të këtij ligji, si më poshtë vijon:

- a) Pensionistët, të cilët kanë përfitur pension sipas ligjeve nr.4171, datë 13.9.1966, “Për Sigurimet Shoqërore në Republikën Popullore të Shqipërisë”, dhe nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar;

- b) Pensionistët, të cilët kanë përfituar pension sipas ligjit nr.150/2014, “Për pensionet e punonjësve që kanë punuar në miniera, në nëntokë”;
- c) Punonjësit, të cilët kanë kryer procese pune në miniera, në nëntokë;
- ç) Punonjësit, të cilët kanë punuar në industrinë e naftës e të gazit dhe personeli inxhiniero-teknik, që ka punuar në ndërmarrjet e sistemit të naftës, si shpim-kërkim, shpim-shfrytëzim, prodhim, sizmikë, gjeofizikë kantieriale, përpunim dhe transport me naftësjellës dhe gazsjellës;
- d) Punonjësit që kanë punuar në metalurgji, në profesione, punë dhe ndërmarrje sipas përcaktimeve në krerët III, VIII e XII, të vendimit nr.526, datë 20.12.1958, të Këshillit të Ministrave, “Për ndarjen e punëve në kategori, për efekt pensioni”.

Neni 3

Vjetërsia në punë dhe periudhat e sigurimit

Për efekt të zbatimit të këtij ligji, vjetërsia e përgjithshme në punë dhe periudhat e sigurimit vlerësohen e njihen sipas përcaktimeve në dispozitat e ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, dhe të akteve ligjore në zbatim të tij.

Për efekt të përfitimeve nga ky ligj, vjetërsia në punë dhe periudhat e sigurimit në profesionet e punë në miniera, në nëntokë, në industrinë e naftës e të gazit dhe në metalurgji do të njihen, si me poshtë vijon:

- a) Periudhat e punës të kryera në miniera, në nëntokë, sipas dispozitave të krerëve I, XIII e XIV, të vendimit nr.526, datë 20.12.1958, të Këshillit të Ministrave, “Për ndarjen e punëve në kategori, për efekt pensioni”, të ndryshuar;
- b) Periudhat e punës të kryera në industrinë e naftës e të gazit, në profesione dhe punë të përcaktuara në vendimin nr.526, datë 20.12.1958, të Këshillit të Ministrave, “Për ndarjen e punëve në kategori për efekt pensioni”;
- c) Periudhat e punës të kryera në industrinë e naftës e të gazit nga personeli inxhiniero-teknik, që ka punuar drejtpërdrejt në prodhim, në sektorë apo brigada si shpim-kërkim, shpim-shfrytëzim, prodhim, sizmikë, gjeofizikë kantieriale, përpunim dhe transport me naftësjellës dhe gazsjellës;
- ç) Periudhat e punës të kryera në metalurgji, në profesione, punë e ndërmarrje sipas përcaktimeve në krerët III, VIII e XII, të vendimin nr.526, datë 20.12.1958, të Këshillit të Ministrave, “Për ndarjen e punëve në kategori për efekt pensioni”.

Pas datës 30.9.1993, proceset e punës në miniera, në nëntokë, në industrinë e naftës dhe në metalurgji do të njihen, për efekt përfitimi sipas këtij ligji, kur ato janë kryer dhe dokumentuar sipas kriterëve të përcaktuara në vendimin e sipërshënuar, pavarësisht nëse të punësuarit kanë kryer aktivitet ekonomik në subjekte me kapital plotësisht ose pjesërisht shtetëror si dhe në subjekte

private. Ndryshimet nga përcaktimet në vendimin e sipërshtuar në emërtimet e profesioneve dhe punëve, që janë si shkak i ndryshimeve të teknologjisë, ndryshimeve të organizimit e të pronësisë së kapitaleve, përcaktohet me vendim të Këshillit të Ministrave.

Pas hyrjes në fuqi të këtij ligji, njihen periudha në profesion, sipas pikës 3, vetëm kur është paguar kontributi sipas nenit 6, të këtij ligji.

Periudhat e sigurimit të pambuluara me kontribute, të paguara në fondin e sigurimeve shoqërore, nuk njihen të vlefshme për këtë ligj.

Neni 4 **Llojet e përfitimit**

Personave të përcaktuar në nenin 2, të këtij ligji, u sigurohen përfitime suplementare, mbi ato të përcaktuara në ligjin nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, si më poshtë vijon:

- a) Pension për shkak të profesionit (llojit të punës);
- b) Shtesë mbi pensionin e pleqërisë;
- c) Shtesë mbi pensionin e invaliditetit.

Neni 5 **Kushtet dhe masa e pensionit për shkak të profesionit**

Personat e përcaktuar në nenin 2, të cilët kanë periudha sigurimi sipas përcaktimeve në nenin 3, të këtij ligji, kanë të drejtën e përfitimeve të pensionit për shkak të profesionit apo të shtesës mbi pension kur plotësojnë kushtet, si më poshtë vijon:

1. Periudha e sigurimit dhe vjetërsia e punës në profesion

- a) Për ish-punonjësit, të cilët kanë kryer procese pune në miniera, në nëntokë, trajtimi me përfitime përpara moshës dhe kushteve të përcaktuara në dispozitat e ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, do të vazhdojë të bëhet sipas përcaktimeve në dispozitat e ligjit nr.150/2014, “Për pensionet e punonjësve që kanë punuar në miniera, në nëntokë” dhe akteve nënligjore të dala në zbatim të tij;
- b) Për ish-punonjësit, të cilët kanë punuar në industrinë e naftës e të gazit, në profesione e punë të përcaktuara në pasqyrën nr. 1, “Punë, që hyjnë në kategorinë e parë”, krerët IV, pikat 2 e 3, dhe XI, të vendimin nr.526, datë 20.12.1958, të Këshillit të Ministrave, “Për ndarjen e punëve në kategori për efekt pensioni”, të ndryshuar, përcaktohet:

- i. mosha: për burrat 55 vjeç; për gratë 50 vjeç;
 - ii. periudha përgjithshme e sigurimit: për burrat 30 vjet; për gratë 25 vjet;
 - iii. vjetërsia në punë të kategorisë së parë: për burrat 15 vjet; për gratë 12.5 vjet.
- c) Për ish-punonjësit, të cilët kanë punuar në industrinë e naftës e të gazit, në profesione e punë të përcaktuara në pasqyrën nr.2, “Punë, që hyjnë në kategorinë e dytë”, kreu V, në vendimin nr.526, datë 20.12.1958, të Këshillit të Ministrave, “Për ndarjen e punëve në kategori, për efekt pensioni”, të ndryshuar, dhe personeli inxhiniero-teknik, që ka punuar në ndërmarrjet e sistemit të naftës, sipas listës së miratuar me vendim të Këshillit të Ministrave, përcaktohet:
- i. mosha: për burrat 60 vjeç; për gratë 55 vjeç;
 - ii. periudha e sigurimit: për burrat 30 vjet; për gratë 25 vjet;
 - iii. vjetërsia në punë të kategorisë së dytë: për burrat 20 vjet; për gratë 15 vjet.

Kur nuk plotësohen kushtet sipas shkronjës “b”, periudha e punës sipas asaj shkronje i shtohet periudhës së punës sipas përcaktimeve në shkronjën “c”. Në këtë rast, kushtet e përfitimit janë ato sipas shkronjës “c”, të sipërsënuar.

- ç) Për ish-punonjësit, të cilët kanë punuar në metalurgji në profesione, punë dhe ndërmarrje sipas përcaktimeve në krunat III, VIII e XII, të pasqyrës nr.1, në vendimin nr.526, datë 20.12.1958, të Këshillit të Ministrave, “Për ndarjen e punëve në kategori për efekt pensioni”, përcaktohet:
- i. mosha: për burrat 60 vjeç; për gratë 55 vjeç,
 - ii. periudha e sigurimit: për burrat 30 vjet; për gratë 25 vjet;
 - iii. vjetërsia në punë të kategorisë së parë: për burrat 20 vjet; për gratë 15 vjet.

2. Masa e përfitimit

Masa e përfitimit mujor për të gjithë personat që plotësojnë kushtet sipas pikës 1, të këtij neni, llogaritet sipas përcaktimeve në dispozitat e ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar.

Neni 6

Masa e përfitimit të shtesës mbi pension

1. Masa e përfitimit

- a) Ish-punonjësit, sipas përcaktimeve në këtë ligj, të cilët kanë përfituar ose do të plotësojnë kushtet për të përfituar pension pleqërie sipas ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, përfitojnë shtesë pensioni për çdo vit periudhe sigurimi në profesion, sipas përcaktimeve në nenin 3, si më poshtë vijon:
 - i. Punonjësit e nëntokës, 1% të masës së pensionit të pleqërisë;
 - ii. Punonjësit e industrinë së naftës e të gazit dhe punonjësit e metalurgjisë, 0,6 % të masës së pensionit të pleqërisë.
- b) Shtesën mbi pension, sipas shkronjës “a”, e përfitojnë të gjithë personat që kanë jo më pak se 6 vite në profesionet dhe punët e përcaktuara në këtë ligj.

II. Masa e përfitimit për invalidët

Përfituesit, sipas përcaktimeve në këtë ligj, të cilët kanë përfituar ose do të plotësojnë kushtet për të përfituar pension invaliditeti sipas ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar, kanë të drejtën e përfitimit të shtesës mbi pension në masën 1% për çdo vit vjetërsie pune në miniera, në nëntokë, industrinë e naftës dhe në metalurgji, sipas përcaktimeve në nenin 3, të këtij ligji.

Neni 7

E drejta për përfitim

1. E drejta për të përfituar pensionin dhe shtesën mbi pension, sipas këtij ligji, nuk parashkruhet.
2. Personi, i cili kërkon të përfitojë pension sipas përcaktimeve të këtij ligji, e përfiton atë:
 - a) nga data e lindjes së të drejtës për përfitim, kur kërkesa paraqitet brenda një viti nga data e lindjes së kësaj të drejte;
 - b) nga data e paraqitjes së kërkesës, kur ajo paraqitet pas një viti pas lindjes së të drejtës për përfitimin e pensionit.
3. Personi, i cili ka përfituar pension sipas përcaktimeve të këtij ligji, nuk ka të drejtë përfitimi të kësteve mujore të pensionit të pleqërisë për periudhën/at gjatë

të cilave ushtron veprimtari ekonomike si i punësuar, i vetëpunësuar apo punëdhënës. Pagesat e përfitimeve ndalohen për çdo kohë që përfituesi është punësuar ose ka qenë ekonomikisht aktiv, me përjashtim kur vetëpunësohet në bujqësi.

4. Përfitimet e caktuara, por të pa tërhequra, paguhet në çdo kohë, por jo më shumë se për 3 vjet. Përfitimet e caktuara, por të paguara më pak, jepen në çdo kohë, por jo më shumë se për 3 vjet.
5. E drejta e organit kompetent për të kërkuar shumat e marra tepër gjatë një viti ushtrohet jo më vonë se 3 vjet, nga data e marrjes së tyre, por jo më vonë se 6 muaj, nga data e konstatimit. Masa e ndalesës për çdo muaj është 20 për qind e kështit mujor të pensionit.
6. Personi, i cili ka përfituar pension e kompensime në mënyrë dhe me mjete në kundërshtim me ligjin dhe që nuk njofton ndryshimin ose heqjen e masës së tyre, detyrohet ta kthejë të gjithë shumën e marrë tepër. Masa e ndalesës për çdo muaj është 50 për qind e kështit mujor të pensionit. Gjithashtu, personi dënohet me gjobë, në masën e katërfishit të dëmit të shkaktuar, pavarësisht nga dënimi i parashikuar në dispozitën përkatëse të Kodit Penal.

Neni 8

Financimi

Përfitimet nga ky ligj financohen nga kontributet dhe nga buxheti i shtetit.

1. Llojet e kontributeve

Personat e punësuar në industrinë minerare, në industrinë e naftës e të gazit dhe në metalurgji, dhe punëdhënësit e tyre, janë të detyruar të paguajnë kontribut për:

- a) pension për shkak të profesionit;
- b) përfitimet shtesë mbi pensionin e pleqërisë.

Shuma e kontributit varet nga paga totale (bruto) e punëmarrësit. Kontributi nuk mund të caktohet nën një pagë minimale dhe mbi një pagë maksimale mujore.

2. Masa e kontributit

- a) Kontributi, që paguhet për mbulimin e përfitimeve të pensioneve për shkak të profesionit, përcaktohet në masën 5% të pagës bruto dhe ndahet në 3 % nga punëdhënësi dhe 2 % nga punëmarrësi.

- b) Kontributi që paguhet për mbulimin e përfitimeve shtesë mbi pensionin e pleqërisë përcaktohet në masën 5 % të pagës bruto dhe ndahet në 2.5 % nga punëdhënësi dhe 2.5 % nga punëmarrësi.

Kontributet sipas shkronjave “a” dhe “b”, të pikës 2, të këtij neni, paguhen në fondin publik për të punësuarit mbi moshën 48 vjeç. Për të punësuarit nën moshën 48 vjeç, kontributet do paguhen në skemën e pensioneve profesionale, krijuar sipas nenit 5/2, të ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar.

Kontributet për të punësuarit mbi moshën 48 vjeç, në masën sipas përcaktimeve në shkronjat “a” dhe “b”, të pikës 2, të këtij neni, mbledhen dhe derdhen në fondin e sigurimeve shoqërore sipas procedurave për mbledhjen e kontributeve të sigurimeve shoqërore të detyrueshme, të përcaktuara në ligjin nr.9136, datë 11.9.2003, “Për mbledhjen e kontributeve të detyrueshme të sigurimeve shoqërore dhe shëndetësore në Republikën e Shqipërisë”, të ndryshuar.

Diferenca ndërmjet efektit financiar të dy llojeve të përfitimeve, sipas këtij ligji, me kontributet shtesë, do të përballohet nga fondet e buxhetit të shtetit. Shuma vjetore e transfertës nga buxheti i shtetit dhe procedurat e financimit të fondit të sigurimeve shoqërore miratohet me vendim të Këshillit të Ministrave.

Neni 9

Përfshirja nga tatimet

Përfshirjet nga ky ligj nuk tatohen.

Neni 10

Indeksi

Përfshirjet, sipas këtij ligji, indeksohen çdo vit, sa herë indeksohen edhe pensionet e caktuara sipas ligjit nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar. Indeksi dhe koha e zbatimit të tij përcaktohen me vendim të Këshillit të Ministrave.

Neni 11

Të drejtat e njohura

- 1) Dispozitat e ligjit nr.150/2014, “Për pensionet e punonjësve që kanë punuar në miniera, në nëntokë”, dhe të akteve nënligjore të dala në zbatim të tij, për personat në moshën mbi 48 vjeç, do të vazhdojnë të zbatohen edhe pas datës së hyrjes në fuqi të këtij ligji.

- 2) Në ligjin nr.8/2017, “Për statusin e punonjësve të industrisë së naftës dhe të gazit”, pika 1, e nenit 2, nenet 9, 10, 11 e 12, pika 1, e nenit 13, dhe nenet 14 e 15 shfuqizohen.

Neni 12

Llogaritja e pensionit

Llogaritja, caktimi, administrimi dhe pagimi i pensioneve që rrjedhin nga ky ligj bëhen nga Instituti i Sigurimeve Shoqërore, sipas procedurave në fuqi për pensionet, në përputhje me ligjin nr.7703, datë 11.5.1993, “Për Sigurimet Shoqërore në Republikën e Shqipërisë”, të ndryshuar.

Neni 13

Kërkesa për përfitim

Përfitimi, sipas përcaktimeve në këtë ligj, jepet me kërkesën e të interesuarit, i cili e paraqet atë pranë agjencisë së sigurimeve shoqërore të vendbanimit të tij, së bashku me dokumentacionin përkatës, sipas përcaktimeve të vendimit të Këshillit të Ministrave dhe rregulloreve të ISSH-së.

Neni 14

Aktet nënligjore

Ngarkohet Këshilli i Ministrave, që, brenda 3 muajve, nga hyrja në fuqi e këtij ligji, të nxjerrë aktet nënligjore në zbatim të nenit 3, të shkronjës “c”, të pikës 1, të nenit 5, të paragrafit të fundit të nenit 8, të nenit 10 dhe nenit 13, të këtij ligji.

Neni 15

Hyrja në fuqi

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

GRAMOZ RUÇI